

titur hodie, quod definiatur ex Cathedra controversia tam gravis, & dicatur sufficere congregatio paucorum destinanda ad nutum Pontificis? Mirum profecto quod a congregatione paucorum expectetur definitio ex Cathedra, quæ reddat rem certam certitudine infallibilis veritatis, quando hoc non expedire censuerunt Pontifices omnes, etiam quando universalis Ecclesia erat in Conciliis generalibus congregata. Enuntientur rationes.

XVII. Primo hæc definitio non expedit Ecclesiæ. Norunt omnes Orthodoxi Theologi, inter principia, seu locos Theologicos, quibus Ecclesia utitur in stabiliendis veritatibus, & profligandis erroribus, enumerari & illud, quod nuncupatur *Auctoritas Patrum*. Hoc totis viribus enervare conantur hæretici, Lutherus, Rivetus, Dallæus, & novissime Picininus. Unum ex argumentis, quo illud impugnare nituntur, est sententia quasi concors Patrum contra definitionem Ecclesiæ (sic illam vocant) in puncto Conceptionis Virginis; & afferunt catalogum Patrum, videntium apud Natalem Alexandrum Sæc. 2. disser. 16. §. 21., in quo notantur quamplures Patres, qui asseverarunt, Beatam Virginem in peccato originali fuisse conceptam; & tamen hoc non obstante dicunt, quod Ecclesia definiit contrarium: quod probant inanibus rationibus; inter quas una est, quia permittit, & præcipit celebrari Festum Conceptionis: ergo, dicunt, auctoritas Patrum, utpote discors a definitionibus Ecclesiæ, non est locus Theologicus. Ita Rivetus suum tuetur errorem, & Picininus in sua Apologia, & in Triumpho debacchatur, existimans per celebrationem Festi Conceptionis fuisse definitum Mysterium. Hinc insultat Alexandro VII. tamquam sibi contradicenti, ex quo in sua Constitutione dicat, se nolle Mysterium decidere, & postea approbando Festum, illud decidit: hoc est, impudenter ait, decidere, & non decidere; non decidere verbis, & decidere facto; quod est sibi contradicere.

Huic hæreticorum objecto concors Theologorum responsio est, quod quamvis Ecclesia adhareat opinioni dicen-